

▼05/12/14-20MST

R GB 05-12 00186 BA628

bah

JANGAN BERGANTUNG KEPADA BANTUAN LUAR, KATA DR , MAHATHIR

XUALA LUMPUR, 5 Dis (Bernama) -- Perdana Menteri, Datuk Seri Dr Mahathir Mohamad berkata Malaysia tidak dapat menggantungkan harapannya pada bantuan luar untuk menjayakan matlamatnya menjadi sebuah negara maju, menjelang tahun 2020.

Dalam perutusannya kepada seminar 'Ke Arah Masyarakat Maju dan Perindustrian: Memahami Konsep, Implikasi dan Cabaran Wawasan 2020+', yang bermula di Genting Highlands hari ini, beliau berkata kekuatan utama negara untuk mencapai matlamat itu terletak pada rakyatnya.

'Kerajaan memerlukan sokongan dan kerjasama rakyat daripada semua golongan termasuk pegawai-pegawai dan kakitangan kerajaan dan sektor swasta, untuk maju dalam bidang ekonomi, politik, sosial, kebudayaan dan kerohanian,' katanya.

Datuk Seri Dr Mahathir berkata negara juga perlu maju daripada segi perpaduan kaum, kestabilan politik dan sosial, sistem kerajaan, mutu hidup dan nilai-nilai sosial dan kerohanian.

Katanya, seminar itu merupakan satu langkah positif ke arah meningkatkan kesedaran dan kefahaman orang ramai mengenai Wawasan 2020.

Sabtu ini, Datuk Seri Dr. Mahathir akan mengadakan dialog dengan para peserta seminar itu, anjuran Unit Penyelidikan Sosio-Ekonomi di Jabatan Perdana Menteri. -- Bernama